

**Illuutillit piginneqatigiillutilluunniit illuuteqartut imaaliallaannaq  
katsorsarneqarsinnaanngitsumik tassanngaannartumik napparsimalernermikkut  
akilersuutiminnik ikiorneqarsinnaanermik periuarfissinneqarsinnaasunngorlugit  
pisortanit ikiorsiissutit pillugit Inatsisartut peqqussutaata nr. 15, 20. november 2006-  
imeersup allanngortinneqarnissaanik Naalakkersuisut peqquneqarnissaanik  
Inatsisartut aalajangiiffigisassaatur siunnersuut.**

(Inatsisartunut ilaasortaq Malik Berthelsen, Siumut)

### **Akissuteqaat**

(Ilaqutariinnermut, Kultureqarnernermut, Ilageeqarnermut Naligiissitaanermullu  
Naalakkersuisoq)

### **Siullermeerneqarnera**

Aalajangiussassatur siunnersuutinnut, inunnut nammineq inigisalinnut tassanngaannartumik napparsimalerneq pissutigalugu sulisinnaajunnaarallarsimasunut pisortatigoortumik ikiorsiisarneq pillugu ajornartorsiummik takutitsisumut qujanaq.

Aallarniutitut Naalakkersuisut oqaatigissavaat, nunatsinni innuttaasut tassanngaannartumik napparsimalerneq pissutigalugu sulisinnaajunnaarallarsimasut pisortanit ikiorserneqarnissamik pisariaqartitsineranni assigiinngissitsinermik pineqartussaannngimmata.

Pisortanit ikiorsiissutit pillugit Inatsisartut peqqussutaanni nr. 15, 20. november 2006-meersumi § 7 naapertorlugu, innuttaasut tassanngaannartumik pisariaqavissumik pissaaleqilersut pisortanit ikiorserneqarsinnaapput, tassa innuttaasut inooqatigiinnermi pisimasunik, soorlu nappaammik, erninermik, suliffissaarunnermik assigisaannilluunniit nalaataqarsimagunik, aamma imminnut ilaqtaminnillu pilersuinnermut akiligassanullu aalajangersimasunut pisariaqartitaminnik pissarsisinnaanngikkunik.

Tassa tassanngaannartumik pisariaqavissumik pissaaleqilernerme pisortanit ikiorsiissutinik pissarsisoqarsinnaavoq, tamanna atuuppoq inimi attartukkami imaluunniit nammineq illuutimi piginneqatigiilluniluunniit inissiami najugaqaraluaanni.

Inuk tassanngaannartumik napparsimalernini pissutigalugu sulisinnaajunnaarallartoq, inatsisartut peqqussutaanni piunasaqaatinik naammassinnissimaguni pisortanit ikiorsiissutinik pisinnaatitaavoq.

Pisortanit ikiorsiissutit pillugit Inatsisartut peqqussutaanni § 8 naapertorlugu, pilersuinnermut akiligassanullu aalajangersimasunut kiisalu ataasiartumik aningaasartuutitut pisortat ikiorsiissuteqarsinnaapput, tassa innuttaasup § 7-imi piunasaqaatit naammassisimallugit napparsimaguni taamalu sulisinnaanani.

Malugeqquneqarpoq, innuttaasoq atorfinitsinneqarnermini isumaqatigiissuteqaruni napparsimanermini akissarsiaqarnissamut pisinnaatitaammat, kiisalu sapaatit akunnerini 13-  
ini kingullerme sulinerme inuussutissarsiutilittut suliffeqareersimaguni piffissamilu tassani nalunaaquttap akunnerini ikinnerpaamik 182-  
ini sulereersimaguni. Suliffeqanngikkallarnerme ikiorsiissutit pillugit Inatsisartut peqqussutaat nr. 5, 1. juni 2006-meersumi § 4 naapertorlugu

suliffeqanngikkallarnermi ikiorsiissutinik pissarsinissamut piunasaqaatit innersuussutigineqarput.

Pisortanit ikiorsiissutit pillugit Inatsisartut peqqussutaanni § 13, imm. 2 naapertorlugu taamaallaat pisartagaqartumut taassumalu ilaqutaanut pisariaqavissutigut pilersornissaannut ikiorsiissutinik tunniussisoqarsinnaavoq aammalu ineqarnermut akiliummut, atuinnermut aningaasartuutitut.

§ 13, imm. 2-mut oqaaseqaatini allassimavoq, taamaallaat ineqarnermut akiliummut naleqquttumik pisortatigut ikiorsiisoqarsinnaasoq. Inigisamut aningaasartuutitut naapertuuttut missingersuutitut aalajangersaanermi toqqammavigineqartassaaq ilaqutariit assigisaanik inoqutigiiusut pisortat inissiaataanni attartortittakkani najugallit, taamatut atsigisumik initalimmu akiliutigisartagaat nalinginnaasut. Taamaammatt imaassanngilaq ilaqutariit inigisami akisoorsuarmi imaluunniit inuk BSU-mik illumi najugalik, piginneqatigiilluni inissiami imaluunniit nammineq pigisatut inissiami najugaqartut akiliunneqartassasut.

Pisortanit ikiorsiissutinik tunniussisarnermi isumaavoq ikiorsiissutisisup illup tuninerani akiligassat peereerlugit iluanaaruteqannginnissaa.

Pisortanit ikiorsiissutit pillugit ilitsersuummi takuneqarsinnaavoq, pisortanit ikiorsiissutinik pisartagalik piginneqatigiilluni inissiami imaluunniit nammineq pigisamik inissiami najugalik inissiamut aningaasartuutissat matussuserniarlugit akiligassanut aalajangersimasunut pisortanit ikiorsiissutinit tunniunneqartut saniatigut aningaaserivimmu atorniartariaqartoq. Aningaasartuutitut aalajangersimasunut illusiniarluni taarsigassarsiarisimasanut akilersuutiginiarlugit taarsigassarsianut taama ittunut kommune aningaaserivittut atorneqarsinnaanngilaq. Malittarisassat malillugit siunertarineqanngilaq, taamatut ikiorserneqarnermi pisortanit ikiorsiissutit utertitassatut taarsigassarsiarineqarsinnaanerat.

Inatsisartut peqqussutaanni § 13, imm. 2-mut nassuiaatit kiisalu ilitsersuummut nassuiaatit aallaavigalugit Naalackersuisut isumaqarput, pisortanit ikiorsiissutit pillugit inatsit naapertorlugu illusiniarluni taarsigassarsinermut akilersuutitut ikiorsiisoqarsinnaannginnera immikkoortitsinerunngitsoq.

Taamatut nassuiaateqarlutik Naalackersuisut inassutigaat, aalajangiussassatut siunnersuut manna itigartitsissutigineqassasoq.